

## LE FESTE ŞÈ CAMBIADE

Şè possibile che i tempi sia cambiadi tanto come i dişi i veci? Go deciso de controlar come şè le feste de ogi e quele de setanta ani fa.

Mi Nadal lo festegio a casa o in ostarìa. Quel giorno se riunisi tuta la famiglia per festegiar tuti insieme. Magnar e beber şè in abondansa. Se comincia con el brodo, se continua con la pasta o coi gnocchi, se pasa ala carne e se finisi col dolce. Se magna el paneton o 'l pandoro. Dopo se ciacola tuto el dopopranzo. Prima del pranzo se va a mesa e ancora prima, quando me sveio, verşo tuti i regali. Ricevo novi regali, uno de şia, uno de mama e papà, uno de nono e cusì vanti. A casa gavemo un bel albero grande de Nadal de plastica che sembra vero.

Mia bisnona me ga contà che setanta ani fa solo i richi poteva permeterse l'albero de Nadal. Un ano suo fradel ga rubà un zupin per gaver l'albero de Nadal nel bosco del visin. Lu şè vegnù sigarghe ala loro mama Margherita che paghi el zupin cinque lire. Ela no la gaveva sti soldi e ghe ga tocà andar in caserma. La şè stada condanada a sete giorni de sesolar el campo de frumento del visin.

La sera dela Vigilia la mama la mandava a dormir tuti quatro i fioi perché la faseva le fritole in 'na granda mastela. El paston iera semplice, senza ua pasa e pinoi. De matina i fioi co se sveiava i trovava visin el leto due fritole e un bicer de late de cavra.

Mi per Carneval me pronto un mese prima. Decido cosa me vestirò e compremo o fasemo el vestito. El şorno de Carneval se vestimo tuti in maschera e andemo con le saine per Limignan o Castelvenere per le case e ciolemo quel che la gente ne ofri: ovi, ciocolate, pomi, naransi, soldi, dolci e altro. Dopo 'ndemo veder la parata a Portorose o a Buie.

Setanta ani fa se vestiva ma con poco: strase de casa e coriandoli. Se faseva le fritole o i crostoli. Se 'ndava per le case in pici grupi se cantava: «Carneval, Carneval no sta 'ndar via, te daremo una iacheta, ogni paso 'na saieta e in canton un scopazon.» La gente ghe dava un pomo, due nosele, due nosi o un ovo. Alla fine se 'ndava de qualchidun del grupo e là se faseva la fritaià e se la magnava insieme.

Per Pasqua mi e mio cugin Thomas fasemo la gara chi ga più ovi de ciocolata. La matina de Pasqua verşo tuti i ovi e buto tuto per aria, cusì mama ga per cosa rabiarse. Magno solo la ciocolata che me piaşi, quella al late perché la ciocolata fondente o la bianca no me piaşi. Dopo 'ndemo a mesa e a pranzo coi parenti. Se magna brodo, pasta e gnocchi, carne e dolce.

In questa ocasion magnemo la colomba. Noi pici se gioghemmo con le sorprese trovade nei ovi e i grandi i ciacola tuto el dopopranzo.

Una volta invese se faseva le pinze soto la »črepnja«. La mia trisavola la faseva una titola col ovo per ogni fio. I muli i giogava a pisigar i ovi. Chi rivava a pisigar el ovo coto con el soldo se cioleva via l'ovo e el soldo. Se l'ovo non veniva pisigado el parono del'ovo se cioleva sia i soldi che l'ovo.

Mia bisnona la ga dito che iera meio una volta perché iera povertà e se godeva dele picolese e se giogava de più.

Secondo mi tornar ai tempi de 'na volta saria grave. Non podaria viver senza television, computer e telefonin perché ai tempi de oggi la tecnologia şè in ogni casa. A mi no me piaşesi viver in povertà ma ai tempi pasadi la gente se conoseva e i pasava più tempo insieme. Questo me piaşaria.